



SIUMUT INATSISARTUNI ILASORTAATIT

16. august 2012

UKA 2012/155

Inatsartut Suleriaasianni § 33 naapertorlugu Inatsisartuni aalajangiiffigisassatut siunnersuut imattoq saqqummiupparput:

Nunatsinni avatangiisinut aningasaateqarfimmik pilersitsinissaq sulissutigeqqullugu kiisalu Inatsisartut aningasanut inastisaanni konto 24.11.23-mi naatsorsuutit, nukissiornemi ikummatissanut avatangiisit pillugit akitsuutikkut isertitat avatangiisinut aningasaateqarfimmut atugassanngorlugit immikkoortinnejartalernissaat sulissutigeqqullugu Naalakkersuisut peqquneqarnissaannik Inatsisartut aalangiiffigisassaattut siunnersuut.

(Medlemmer af Inatsisartut for Siumut Kim Kielsen og Malik Berthelsen)

Tunngavilersuut:

Avatangiisinut, eqqakkanik passussinermut, uuliaarluernermut, upalugaarsimanermut il.il. inatsisit misissuataareerlugit, pineqartut pillugit annertunerusumik iliuuseqarusussuseqarneq immaqalu aamma aningasaatigut iliuuseqarusussutsip killeqarnera malunnarpoq, naak pineqartut nunarsuarmioqataaneq aamma eqqarsaatigalugu pingaaruteqarluinnaraluartut.

Kommunit ilaasa aningasaqarnertik pissutigalugu eqqakkanik passussinissamut pisussaaffitsik tamaat naammassisinnaanngilaat, taamaammallu eqqakkat immikkoortiterneqaratik avatangiisillu mianerineqaratik eqqaavissuarnut assigiinngitsunut eqqaannarneqartarlutik.

Avatangiisinut aningasaateqarfimmik pilersitsinitsigut kommuninut innuttaasunullu eqqakkat avatangiisinut navianaatillit pitsaanerusumik passunneqartarnissaat kiisalu avantangiisinut eqquummaarinnerusumik pissusilersonermut tunngasunik politikikkut piumasaqaatit naammassisarnissai ajornannginnerusumik angusinnaalissavagut. Avatangiisinut aningasaateqarfiup aningasaataanik atuineq maleruagassanik aalajangersakkanik tunngaveqartumik ingerlanneqassaaq, imatullu assersuutigalugu atuisoqarsinnaassaaq: imip atoriikkap kuutsitap salinneqarnissaanut tapiissutinut, eqqakkanik ikuallaaviit ingerlanneqarnerannut tapiissutinut, pinngortitaq pillugu ilisimatusarernut tapiissutinut, paasisitsiniaanernut kiisalu pinngortitaq avatangiisillu pillugit oqallinnernut aammalu allanut issittumi avatangiisitsinnut innarlujasumut tunngatillugu suliniutinut tapiissutinut.

Avatangiisit piujaannartinnissaat pillugit ilisimasat allallu siaruarterlugillu patajaallisarneqarnissaat tamatsinnut pingartuuvoq, tamakkumi siulitsinnit kingornussavut kinguaatsinnut ingerlatseqqitassarigatsigit.

Pissutsillu taamatut ingerlaqqinneranni nioqqutissiatta pinngortitameersut annerusumik avataaniit soqutigineqarnerulersinnaapput, nunatsinnimi avatangiisinut aningasaateqarfimmik pilersitsinitsigut pinngortitamik taassumalu pisuussutaanik piujaannartitsinermik pingartitsinerput nunarsuarmioqatitisisinnut takutissagatsigu.

Nukissiornemi ikummatissanut avatangiisit pillugit akitsuutikkut isertitat avatangiisinut aningaasaateqarfimmut siunissami nakkartineqartalernissaat matumuuna siunnersuutigaarput.

2006-imi Inatsisartut upernaakkut ataatsimiinneranni Siumumit avatangiisinut aningaasaateqarfimmik pilersitsinissamik siunnersuut siullermik saqqummiukkatsigu, assersuutitut taavarpuit uuliamik ikummatissat tamarmik literimut 5 øremik avatangiisinut tunngasumik akitsuuserneqarsinnaanerat. Naalakkersuisulli 1. januar 2011 aallarnerifigalugu uuliamik ikummatissat literimut 10 øremik avatangiisinut tunngasumik akitsuuserpaat. Taamatut akitsuusiinermi aalisartut piniartullu umiatsiaararsortut ukiumut akitsuutinut 300 kr. missaannik aningaasartuuteqalersinneqarput, taakkumi 2005-imi misissueeqissaarnerup kingorna nalunaarusiami ukiumut ikummatissamik 2.000 – 3.000 literit akornani atuisartut uppernarsarneqarmat, taamatullu kilisaataatillit ikummatissanillu annertunerusumik atuisut allat suli annerusumik atuisarmata aningaasartuuneqarnerulersinneqarlutik. Taamattaaq illuutillit ukiumut 6.000 – 7.000 literimik uuliamik atuisutut missingerneqartut, ukiumut kr. 700 missaanni aningaasartuuteqarnerulersinneqarlutik.

Ullumikkut avatangiisinut tunngasumik akitsuummut tunngatillugu akitsuummik isertitat avatangiisinik pitsangorsaanermut atorneqaranik toqqaannartumik nunatta karsianut nakkartineqartarnerat ajornartorsiutaavoq.

2012-mut Inatsisartut aningaasanut inatsisaanni naatsorsuutigineqarpoq nukissiornermi ikummatissanut avatangiisit pillugit akitsuusiinikkut 20 mio. kr.-nit isertinneqassasut.

Tunisassiat allat avatangiisinut innarliisinnaasut 25 – 50 øremik akitsuuseraanni suli aningaasat amerlanerusut avatangiisinut aningaasaateqarfimmut isertinneqartalersinnaapput, tamanna aamma uagut atuisartut avatangiisinut isiginneriaasitta pitsaunerulerteranik piujuannartitsinissamillu pigaartitsinerulernitsinnik kinguneaqassaaq.

Inatsisartut Aningaasaqarnermut Akileraartarnermullu Ataatsimiititaliaat akitsuutit annertussusissaat pillugit siunnersuusiornerup saniatigut nioqqtissiat allat suut akitsuuserneqarsinnaanerannik siunnersummik saqqummiisussaatinneqassasoq isumaqarpugut.

Nunani issittumiittuni ineriartorneq siuariarsimaqaaq taamaammat avatangiisinut aningaasaateqarfimmik pilersitsinissaq avaqqunneqarsinnaanngilaq, taamaalioruttami aatsaat nunatsinni issittumilu pinngortitarsuatta alianaaqisup piujuannartinnissaa eqqarsaatigalugu tamatta piumasaqaativut qaffasissut naammassisinnaagatsigit.

Aningaasatigut allaffissornikkullu sunniutissat:

Avatangiisinut aningaasaateqarfiup pilersinnissa allaffissornikkut ingerlanneqassaaq tamannalu allaffimmiup AC-p ataatsip ukiumik ataatsimik sulineranik, tassa aningaasanngorlugu 500.000 kr.-nik naleqassangatinneqarpoq. Avatangiisinut aningaasaateqarfiup ulluinnarni ingerlanneqarnissa allaffissornikkut AC-t pingasut ukiumut sulinerannik, aningaasanngorlugu 1.5 mio. kr-nik naleqassangatinneqarpoq. Avatangiisinut aningaasaateqarfiup siulersuisuinut aningaasartutissai ukiumut 500.000 kr.-niunissaat naatsorsuutigineqarpoq, tamatumalu saniatigut ininik attartornermut allatigullu allaffissornikkut aningaasartuutinut ukiumut 1 mio. kr.-nik aningaasartuuteqassangatinneqarluni. Tassa avatangiisinut aningaasaateqarfik ukiumut 3 mio. kr-nik aningaasartuutaasassasoq missingunneqarpoq.

Nukissiornemi ikummatissanut avatangiisit pillugit akitsuutikkut isertitat avatangiisinut aningaasaateqarfimmut atugassanngorlugin immikkoortinneqartalernissaat soorunami allatigut isertitsitassarsiornissamik sipaaruteqarnissamilluunniit malitseqassaaq.